

# Ikan di Tasik Pedu makin kurang

Nelayan tasik harap kerajaan beri bantuan seperti nelayan laut

Oleh WAN MOHD NOOR HAFIZ  
WAN MANSOR

## PEDU

**N**elayan yang mencari rezeki di tasik Empangan Pedu dan Empangan Muda berharap kerajaan dapat membantu mereka seperti nelayan laut berikutan hasil tangkapan ikan semakin berkurangan susulan kemarau sejak Disember lalu.

Akibat hasil tangkapan yang semakin berkurangan, ada nelayan yang

sanggup membahayakan nyawa mereka dengan meneroka di kawasan lebih dalam selain terpaksa menanggung risiko pukot rosak akibat tersangkut pada kayu di dasar tasik.

Tinjaun *Sinar Harian* mendapati pendapatan nelayan semakin tidak menentu apabila mereka cuma memperoleh kira-kira 10 kilogram (kg) ikan berbanding 50 kg sebelum ini.


Seorang nelayan dari Kampung Belukar Luas, Md Jusoh Abdul Rashid, 74, berkata, dia mencari ikan di Tasik Pedu sejak tahun 1970-an dan kini merasakannya pendapatannya merosot.

“Kami harap kerajaan dapat melihat perkara ini dan membantu kami seperti nelayan laut,”



**MOHD ASRI**

katanya.



**Mohd Ridzuan menunjukkan hasil yang tidak seberapa semasa memeriksa pukotnya di Tasik Pedu baru-baru ini.**

Seorang lagi nelayan tasik, Mohd Ridzuan Abdul Wahab, 33, berharap kerajaan dapat memberi perhatian dengan memperbaiki jalan ke Pengkalan Mong Gajah bagi memudahkan nelayan

membawa keluar hasil ikan untuk dijual.

Jelasnya, nelayan di situ terpaksa mengeluarkan modal sendiri bagi meratakan laluan masuk dan membersihkan semak samun di sekelilingnya.

“Sekarang ini pendapatan pun semakin berkurang jadi kami harap kerajaan dapat membantu menyediakan jalan berturap untuk memudahkan nelayan berulang-alik ke Tasik Pedu,” katanya.

Sementara itu, Ketua Daerah Perikanan Padang Terap, Mohd Asri Yusuf berkata, jumlah pendaratan ikan nelayan di Tasik Pedu diakui semakin berkurangan sejak tiga tahun lalu dan pihaknya percaya jumlah itu semakin menurun berikutan musim kemarau.

“Kami akan memohon peruntukan daripada kerajaan bagi menambah benih ikan.

“Pada tahun 2017, sebanyak 156,565 benih ikan dilepaskan di tasik itu dan hasil pendaratan ikan pada tahun itu adalah sebanyak 41,435 kg. Pada tahun 2018 pula 40,437 kg dan ia terus menurun kepada 30,112 kg sepanjang tahun 2019,” katanya.